

Mesaz Rezistans ek Alternativ a Linion Pep Morisien - LPM

Rezistans ek Alternativ swet bonn aniverser a Linion Pep Morisien Rezistans ek Alternativ swet bonn Fet di Travay a klas travayer Repiblik Moris

Nou pe anvoy sa mesaz ekri-la a LPM, akoz nou pa kapav prezan fizikman, etan done ki nou pe organiz Lamars 1 Me, depi St Jean ziska larivier Ebene, a lokasion Fet Travay 2023.

Rezistans ek Alternativ, antan ki enn parti politik, ki dekrir limem kouma eko-sosyalist, partaz enn sertin nomb valer avek LPM.

Pou Fet Travay 2023, ReA ek so bann alie sindikal, inn swazir Tem samtral:

Travayer: twa ki ena pouvwar!

Sak lane, depi 1938 dan Moris, Fet Travay, rapel nou ki ena 2 klas prinsipal dan la sosiete kapitalist: Klas travayer ek Klas kapitalist. Nou kontan, nou pa kontan, se sa realite de klas dan lekel nou pe viv.

Vre prodikter larises, se lafors travay. Depi lepok esklav-kouli, depi lepok lekonomi plantasion, pass par zonn frans, lotel, diferan lindistri, servis, ziska lepok zordi, ki li par travay maniel ou travay intelektual, se klas travayer ki finn batir pei. Dan Moris zordi ena pre 560,000 salarie, 200,000 dimounn ki travay pou zot mem, ek pre 250,000 pansioner, ki finn vers zot laswer pou lekonomi pei. Ansam klas travayer Moris konstitie plis ki 1 milion dimounn, alor ki klas kapitalis, apenn ena 10,000 dimounn. Fet travay 2023, enn lokasion pou realize, ki se klas travayer ki ena veritab pouvwar dan so lame:, pouvwar pou prodwir, kre larises, me osi pouvwar pou sanz sa sistem politik ek ekonomik, kaptalism pouri dan lekel nou pe viv.

Moris dan enn lakwaze so listwar avek tou kalite kriz

Kriz inegalite sosial

Enn kote lavi pe vinn depli an pli ser. Se klas travayer, dimounn mizer me osi klas mwayenn, ki pe port fardo ogmantasion kou lavi. Zenes pa pe trouv enn lavenir dan Moris. Boukou pe kit pei. Derier enn fasad 'modernite' ek 'avanse sosial' ena enn sistem pouri ek inzist. De lot kote klas kapitalis pe anrиси apre ki zot finn profit larzan lepep pandan Covid-19 san rande, aster zot pe refer profi par milyar.

Kriz sistem

An memtan sistem ki nou finn erite depi lindependans finn pouri net: sistem elektoral, politik, lapolis, leta, boukou lezot institision inn pouri net. Skandal, koripsion, اساسina, mafia, pourisman institision piblik pe degout boukou dimounn.

Kriz ekolojik

Anparalel ena enn akselerasion destriksion ekolojik ek akaparman patrimwann natirel par kapitalis lokal ek etranze, ki pe dekouraz boukou zenn ek dimounn ki kontan lanatir. Pri later el lakaz pe monte an fles pou zenes moris.

Danze divizion kominal

Tou sa pe deroule, dan moman kot sertin politisien, sirtou depi rezim o-pouvwar, pe pli an pli agrip lor divizion kominal dan kontext eleksion zeneral ki pe vini. Pou sa, zot mem pare pou alim dife kominal, mem si sa kapav antrenn violans ek bagar. Fode pa klas travayer ek lepep tom dan sa piez-la.

Seki pou arive dime, depann lor ki sime nou swazir zordi!

Kan nou divan enn lakrwaze vedir nou ena pou swazir. Swa nou dir tou korek ek nou asim responsabilite pou deriv ki pe agrave sak zour. Swa nou dir, inn ler pou azir par koumans fer enn aksion ki pou sanz kitsoz. Pa swazir pa enn swa, li vedir swazir res parey.

2023: enn moman istorik desiziv

Azordi 55-an apre Lindepandans nou dan enn sitiaison ase similer a 1936 ek 1969. Sistem sou lekel Moris inn opere, inn vinn obsolet, inn depase, pou pa dir pouri. Bizin enn sanzman sistem-la. Sanz zis gouvènmman pa pou sifi. Pran ninport kisann la dan lopoziyon met dan sa sistem pouri la, li pou prodwir mem pourtir! Boukou dimounn finn deza ariv a sa konklizyon-la. Bizin sanz Konstitisyon Pei limem. Ek lerla sanz bann lalwa ek gouvèrne selon sa nouvo konstitisyon-la.

Se pou sa ki ReA pe propoz enn *Fron Initer tou bann lafors dopozisyon parlmanter ek extra-parlmanter*, pou al dan prosenn eleksion zeneral pou gayn enn manda $\frac{3}{4}$ ansam, pou fer enn sartin transformasion konstitisyonel, ki nesese, dan enn period tranzisyon pa plis ki 2-an. ReA inn propoze ki apre sa 2-an re-apel, eleksion zeneral dan kad nouvo sistem elektoral ek nouvo konstitisyon.

Ki sanzman Konstitisyonel fondamantal ki ReA pe propoze?

Bizin sanz sanz konstitisyon:

1. Pou sanz sistem eleksion, pou eliminn kominalism, pou elekter ena drwa met deor Depite ki fane apre eleksion, pou ena enn doz proporsyonel kot Depite reprezant so lide politik olie kominal, pou larzan kapitalist ek mafia pa koronp eleksion ek gouvènmman
2. Pou met tou drwa ekonomik, sosial ek kiltrel ki rekonet par UN, dan Konstitisyon. Savedir inklir drwa a lasante, lozman, travay, ledikasion, pansyon, lagrev dan Konstitisyon.
3. Pou drwa Lanatir dan Konstitisyon, pou protez trezor ek patrimwann natirel komin pei
4. Pou nou vre listwar rant dan Konstitisyon
5. Pou nou Konstitisyon promouvwar lape.

Nou finn deza ena 2 rankont politik avek LPM lor sa propozisyon-la. Deza ena konverzans lor plizier sanzman Konstitisyonel ki pe propoze par ReA. Deza ena konverzans pou ki LPM partisip dan enn Konferans Konstitisyonel ki pe organize biento, pou diskrit lor bann sanzman konstitisyonel ki nesese.

Anmemtan, deza enn konverzans lor nesese ki avan eleksion zeneral ena enn mini-amandman konstitisyonel, pou ki sitwayen gayn drwa poz kandida san klasifikasion kominal.

Anplis, deza ena konverzans pou soutien resiprok fas a lamonte grandisan enn form de *'persekisyon maladiv'* bann opozan politik par rezim pouvwar.

Alor ankore enn fwa, nou swet tou dimounn ki dan Octave Wiehe, enn bonn aniverser ek enn bonn Fet di Travay.

Nou zwenn biento!

**Ashok Subron, Stefan Gua ek Dany Marie
pou Rezistans ek Alternativ, 1 Me 2023**

